

Шавкат Мирзиёев Қаршидаги кўп қаватли уйларни бориб кўрди



Қарши шаҳрининг Наво маҳалласида 7 та 16 қаватли уй қурилмоқда. Президент Шавкат Мирзиёев мазкур туар жойларни кўздан кечирди.

Бу ҳудудда жами 39 та кўп қаватли уй барпо этилиши режалаштирилган бўлиб, беш босқичда амалга оширилади.

Айни пайтда, биринчи босқичда 3 та туар жой қуриб битказилган. Бунёдкорликда сейсмология ва архитектура талабларига алоҳида эътибор қаратилган. Сифатли, энергия тежовчи материаллардан фойдаланилган. Хонадонларнинг ҳар бирига алоҳида сув иситиш мосламалари ўрнатилган.

Давлатимиз раҳбари уйларнинг қурилиш технологияси ва сифатига эътибор қаратди. Ёнғин хавфсизлигини, коммунал хизматлар барқарорлигини таъминлаш бўйича қўшимча кўрсатмалар берди.



Худуд ободонлаштирилган, болалар майдончаси ташкил этилган. Яна 4 та кўп қаватли уйни келгуси йил март ойида фойдаланишга топшириш мўлжалланган.

Шунингдек, 1680 ўринли мактаб, 2 та мактабгача таълим муассасаси, поликлиника, супермаркет, спорт майдонлари, истироҳат боғи ва бошқа обьектлар барпо этилади.

Бу ерда автомобиль йўллари қуриш ва таъмирлаш, Қарши шаҳрида иситиш, ичимлик суви ва канализация тармоқларини модернизация қилиш чора-тадбирлари тақдимоти ўтказилди.

Шу билан Президент Шавкат Мирзиёевнинг Қашқадарё вилоятига сафари якунланди.



Манба